

Jaorverslag VVDS 2019-2020

Ut jaor van:

- Prins Fabian d'n urste en Prinses Lonneke
- Jeugdprins Pepijn d'n urste en Jeugdprinses Janne d'n Urste
- Ut jaor van de "Ut jaor vans"
- Ut jaor van de 8x11 jubileumfiëste
- Ut jaor van ut eier ète bej de prins en prinses
- Ut jaor van un relatief jong bestuur
- Ut jaor dat Rob is geflikkerd, Toffel ien de huid van unne flikker kroop en iën raodslid is opge... weg gegaon naor un neje uitdaging
- Ut jaor van nog unne kier eier ète bej de prins en prinses
- Ut jaor dat d'r minder mantelzörg was aangezien ze dat ding nogal es unne kier uut han
- Ut jaor van ut nie naor huus te kriege zien
- Ut jaor dat d'n optocht verzet wier
- Ut jaor van friet ète bej de prins en prinses
- Ut jaor van de shotjes
- Ut jaor van de kwèk
- Ut jaor van den driepoët
- Ut jaor van de afterpartys
- Ut jaor van nog unne kier of wat eier ète bej de prins en prinses
- Ut jaor van de krekels
- En natuurluk ut jaor van wer un geslaagd vastelaovesseizoen

Ut bestuur bestoond uut:

- Vurzitter Robert Steeghs
- Vorst Jop Loonen
- Penningmèster Stijn Nelissen
- Sik Petra Raijmakers

En de bestuursleje . . . Han van de Sande, Rob Kunkeler, Loek Arts en Marc van de Ven

De Raod van Elluf bestoond dit jaor uut:

Pascal Classens, Fred Peeters, Roel Steeghs, Marc Steeghs, Paul Geurts, Sander Peeters, Daan Willems, Marc van de Ven, Wilbert Steeghs, Toffel Gommans en Willem Lemmen

En de dansmariekes ware:

Amber Brugmans, Judith Steeghs, Linda Willemsen en Renske Zanders.

Vur ut urst ien mien jaorveslageschriefcarrière kan ik zegge dat ut seizoen dit jaor nie tradisiegetrouw begos op 11-11, mar op...

15-11:

Umdat wej 8x11 jaor bestaon, vonde wej dat reje vur un feestje, en ien os prachtige tent bej Han op de plak mos ut allemaol gaon gebeure. Umdat dat iets bèter uutkwaam begos vur os ut seizoen op vreedag de 15^e november mit de "Vriende van Oeldere Live". Dizze aovend wier geopend dur bejna alle ald-vorste, en de rest van de aovend ware d'r allerlei optrejes van verschillende buutreedners, en ok kosse de muziekoptrejes nie ontbrèke. Dit alles gebeurde ien de prachtig angeklejde tent, mit as buhne un heuse alde loëds. Biezonderhede den aovend: Vorst Jop haaj letterluk zien oëg laote valle op unne microfoonstandaard, en Ger Jansse haaj zien oëgje figuurluk laote valle op Willem Lemmen. Ok kosse de microfoons nie overweg mit de Military Grade Wifi-zenders die alle andere signale wegdouwde.

16-11:

...was ut jaorlukse vorsteraodsbal bej os ien de tent. Vorst Jop moog onder de muziek van "Deurdondere" alle vorste ankondige die op hun beurt names hun dörp mooge sprèke. Ut decor zaag d'r prachtig uut mit unne echte trakter mit frontlaaier op de buhne. As de sprèktied op was wier d'n trakter naor achter getrokke en ginge de loëdsdeure dicht. D'n aovend liep as unne trein, zellefs de microfoons dun ut goed. We han de Wi-Fi mar uitgezet toen we tillefoontjes kregge vanuut Pole wat os Wifi-wachtwoord was, aangezien ien Warschaw dat ut sterkste signaal was wat d'r te ontvange was. We han ok unne heuse biermèter geïnstallierd, den bejhield hoeveul iedere veriëning haaj gedronke. Dit was natuurluk puur vur de bewustwording en absoluut gen wedstrijd um de kas te spekke. Lekke Band sloot d'n aovend af, en al was ut nie echt veul Carnavalsmuziek, ut was biëstig gezellig. Verdere biezonderhede: Un aantal buutedörpse dansmariekes viele op Daan Willems, un aantal meense klomme ien de tentpöol mar die zien toen snel NAR beneje gehald, en Willie zaag zien investiering van 2,20 ien roëk op gaon.

22-11 was de herinneringe-aovend, eigeluk spesjaal georganiseerd vur de Jeugd van Vroeger. De vergriezing het flink toegeslage ien Oeldere, want mier as de helleft van ut dörp huurt blikbaar vort bej dees categorie. Den aovend wier anèn gepraot dur William en Fabian as Loone en Thei, Henk Deters en Waldina hebbe ok opgetreje, d'r was nog unne mojje cheque van de dörpsraad, mar de hoofdact van den aovend was toch echt wel Grad en Petran. Joep Jooste en Ten Duijf won vur os nog wel iëne kier op de plènk gaon staon, en iederiën was benejt of ut nog altied net zo'n succes zeuj zien as vroeger. We kunne wel zegge dat ze os zeker nie teleurgesteld hebbe, want ut optreje sloeg zoëas de mèste gewend ware kei goed an. Unne zeer waardige afsluuter van den aovend waar nog duk over gepraot zal werre.

23-11 was ut 8x11 jubileumfiëst. Unne aovend um lekker mit zien alle te viere dat we jurrig ware. Iederiën was uutgenuëdigd, en uiteindeluk han we un bomvolle tent mit 750 man. Vur de veriëninge was d'r nog unne rodeostier waar alle prinse op hebbe gezète, en ok dat was un leuke activiteit. De gratis hamburgers viele goed ien de smaak, de band Knallerman knalde ut dak deraf, Prins John knalde den scepter durmidde, en ut fiëst ging tot ien de late uurkes dur, kortum unne prachtige aovend.

24-11 was 's middags "Oeldere het Talent". Unne hiële hoëp jeugd, van de jongste tot de aldste, allemaol stoonde ze op de plènk. D'n middag wier an mekaar gepraot dur unne presentator. En ut feit dat d'r snel nog stuul en toffels bejgezet mosse werre wil wer zegge dat ok dizze middag bove verwaachting uut het gepakt. Uiteindeluk was d'r nog unne pries vur de winnaars, en sloot

vorst Jop de jubileumfiëste af dur iederiën te bedanke den hieran mitgehollpe het, eigeluk hallef Oeldere dus, mar ien ut biezonder de vereniging mit alle commissies. We han ien twië wèke eigeluk un compleet seizoen gehad, en dan mos den echte vastelaovend nog beginne, dus we ware d'r nog nie. Mar tot dusver alliën mar complimente.

Uiteraard was daornao de afterparty mit DJ Ruud en Eric. En un foto zet mier as 1000 weurd.

Op 7-12 was d'r unne fiëstaovend vur alle vrejwilligers van ut jubileum. D'r was unne barbecue mit gerokt vleis (nie umdat dat de bedoeling was mar ut kwaam d'r wel van), en natuurluk nao veul gealdehoer het ozze penningmèster uiteindeluk dan toch de knip getrokke en iederiën un paar consumpties gegève. Ut was ok zeker unne gezellige aovend.

14 december zien we wer naor de sterreparade ien Berge gewist. Unne hiële rits artieste kwame wer vurbej, en ok artieste waordur de commissie asbak wer wier uitgebreid mit passief lid Paul. Uiteraard wiere d'r ok wer klier gewisseld en het os raadslid Wilbert ok alvast uitgeprobiërd hoe wèrm den mantel is. En toen iemes den alle prinse un pilske goof tigge um zèj: "Gej ziet gaan gen prins!", toen antwoordde Willie hiël logisch: "Dat maak ik zellef wel uut!", en viët toch moj zien pilske. Uteindeluk hebbe we naoderhand bej de frietkar nog frikandelle mit mayonaise gegète, terwiel Prins John ziene frikandel mit mayonaise anbood an ut vrommes ien de frietkar. Oh jao, en Toffel haaj nogal sjans.

Zondag 5 jannewarie was de prinseproclamasie. Zoëas gewoënluk begosse we ien d'n Terp mit ut aftreje van Prins John. Pascal haaj den scepter wer gemakt, en umdat John d'r nie zo goed mit um kos gaon kreeg hej unne opblaoshamer den al lek bleek te zien. Mar hej kreeg gelukkig ok un moje proclamasie gemakt dur Petra Raijmakers. Hej haaj nog un hiël kort woordje, wel mit beamer, over zien eige seizoen, en toen mosse zej vort verder dur ut lève as ex-prins John en ex-prinses Marion. Gelukkig moge ze allebei ok bej de APK en de APK, naodat John mos raoje Wie of Wat hej was ien un spelleke: Wie bin ik? Toen Ex prins Gerrit nog efkes de Kelderband bedankt haaj ginge wej mit zien alle naor de Liende.

Hier wier gestaakt, want de raad haaj ut zo druk gehad mit ut jubileum dat ze nog genne tied han gehad um ut decor op te bouwe vur ut prins uitkomme. Naodat ze un 24-diëlige doppedoës han gekrege en d'r links en rechts wat toezegginge ware gedaon kos ut afmake van ut decor beginne. Links en rechts vlogte de plate en onderdiële over de bühne, en aoveral ware vère en stukskes mantel te zien, zoëdat niemes mer krek wis waar ze nou mosse kieke. Toen kwame de 11 regels, vlogte de ziecante van ut decor ope en kwame Prins Fabian d'n Urste en zien prinses Lonneke tevurschien. Nao ziene allerurste speech ginge hej en Lonneke ien de nek vur unne polonaise.

Daornao was ut tied vur de jeugd. Prins Fabian liet unne hoëp vurwerpe zien die mit ut jeugdwoo te make han. Vorst Jop stelde de kiender veur ien de zaal vraoge over wie dit nou zun kunne zien, en uiteindeluk kwame nao de 11 regels Jeugdprins Pepijn d'n Urste en Jeugdprinses Janne d'n Urste op unne mök over ut podium geracet. Ok zej dun hunne urste speech en daornao ien de nek. Ut fiëst daornao kwaam langzaam op gang, mar uiteindeluk ging ut vol gas dur zoëas we ok ien de vollegende aovende duk gezien hebbe.

Uiteraard naoderhand eier (mit schaal) ète bej de prins tuus en naodat d'r wat eier onder de bènd van de prins ziene auto ware geleet, uiteindeluk nog un páár pilskes ien d'n Terp. Oftewel, ut wier laat. As dat mar gen vurbode is...

Hoewel we eigeluk han gezeet dat wej un wèk vrej zun hebbe, zien we ondanks dat un wèk latter op **zondag 12 jannewarie** naor ut jeugdprinsebal ien Câtele gewist, umdat ozze prins en prinses daar alle kiender bekant kenne. Ut was un moj fiëstje waar wej d'r al un klein bietje achter kwame dat ut nie naor huus kunne gaon de wèk daorvur gen uitzondering leek te zien.

Op 18 jannewarie was ut Ald Wieverbal. Naachtwèrk verzurregde de muziek, en ongevèr vanaf moment 1 wiere d'r polonaises geloëpe. Ut was hartstikke druk en gezellig. Ozze atleet van ut relatief jonge bestuur woj laote zien dat hej ok unne Robrol 2.0 kos make, en dat lukte bijna. Hej liet zich nie van zien stuk brenge en het daornao nog ekkes dansles gegove an de dansmarietjes. D'r wier veul gehost en gefiëst, en nao de korte afterparty wiere d'r nog lekker eier gegète bej Mark en Bo tuus. Gezien hunnen toestand stonde wej d'r wel van te kieke dat dees twië hun eige huus nog kosse viende. Nie veul latter kwaam d'r ok nog un klène dillegasie uut Câtele eier ète, en zoëas wej ozze Mark kenne wiere die dur um ok mit ope èrm ontvange en vuulde die zich èrg welkom. Ok was Merel kei blie dat ut zo laat was geworre dat ze teminste nie mer hoefde te gaon slaope vurdat ze daags dernao naor de Efteling ging.

De wèk dernao, op 24 en 25 jannewarie, ware de Bonte Aovende. Um 20.00u kwame Prins Fabian, Prinses Lonneke en ut hiële gevolleg via de zaal de bühne op. Mit de opening het Vorst Jop eindeluk de dansmariëkes vur kunne stelle. Ienmiddels han ze al ut jubileum mitgedrèjd, mit prins aftreje en uitkomme hun take volbrocht en ut Ald Wieverbal overleefd. Nao un paar vliegensvlugge vraoge wis iederiën van den hoed en de rand, en kos ut programma beginne.

As urste kwaam de bej os welbekende dansgroep Spotlight uut Câtele hun kunste vertoëne, en dat zaag der wer goed uut.

As twedde stoond de jeugdraad op den groëte Bonte Aovend. Ien hun stuk kos iederiën zien wat der achter de scherme gebeurde, mar wel lichteluk overschaduwde.

Daornao was ut tied vur unne buutreedner, en dizze Ben Vulpen vertelde os wat hej zoëal mit haaj gemakt as schriever. Dit was alwer unne mojje buut van ozze eige Frank Steeghs.

Toen was der genne buut, mar wel un Debuut. Oeldere drèjde nie mer dur, mar gelukkig ware daar Jesper, Cas, Tim en Stan die ut stökske aover han genome mit Hart van Oeldere. Hiël goed gedaan, en wej hope ollie nog dukker te meuge zien op ozze Bonte Aovend.

Ok de slagwerkgroep was wer van de partij dit jaor, en dees jonges van de bouw hebbe os laote zien hoe de Liende ien no time verbouwd kan werre, en ut ok nog goed klinkt.

Wat ok nie kan ontbrèke op de Bonte Aovend, is natuurluk de APK. Dit jaor was de vraog: "Wie zit d'r achter ut masker?" Iederiën haaj un pekske an en un masker op, en zonge un liedje mit. Gelukkig han ze ut mit ut masker op en ut pak an totaal nie wèrm op ut lekker koele podium.

Nao de pauze was ut tied vur de groep Applaus! Zej dun un antal liedjes, mieke wat grappe mit meense uut ut publiek, en iën iemand hiette ien ieder geval "Maat".

Daornao was ut tied vur un kort intermezzo. Op beide dage wiere Robert en Vera ien ut zönneke gezet vur de 11 jaor die ze al bej de veriëninging zate, en vurral Robert genoot hier zichtbaar van. Robert en Vera, nogmaals bedankt vur ollie ienzet, en de orde van de Zilverre Spurriemök is dan ok dik verdiend!

Hiernao was ut tied vur Ranking the Stars Oeldere, oftewel de Kroegtijgers, of hoe ze dan ok allemaol al gehiete hebbe. Zej liete un keur an neusjes van de Oelderse en buutedörpse zalm ranke, en ok de grappe die eigeluk nie kunne, die kosse toch. Moj!

As afsluuter was dit jaor Hans Verbaarschot, den unne mojje buut deuj ovver relatietherapie. Hej voond ut kei moj dat hej mit luid applaus ontvange wier en dat d'r ok nog unne kier ut volkslied vur um gezonge wier.

Ut ware twie mojje aovende, de commissie het wer echt goed wèrk geleverd, ondanks dat ut al biëstig druk was gewist ien november. En durrum hebbe we d'r unne mojje afterparty van gemakt ien de Liende, en daornao uiteraard nog hiël efkes naor d'n Terp. Oftewel, ut wier wer laat.

De zondag dernaon waon wej ekkes naor de receptie ien ut Väole. Dat is nie gelukt, as we ut hebbe ovver: ekkes. Ut begos mit de receptie waarvur wej gen groët cadeau han mitgenome. Vorst Jop het daor uitgeleet dat wej op hun jubileum 11 jaor geleje Jacquo Gerrits cadeau han gedaon, en dat den persoonluk verantwoordeluk is vur minimaal 1% van de Vaölenare, dus dat wej op dat cadeau nog wel efkes kosse tere. Den middag kwaam ok nog iets van ut LVK nève mit un keur an artiëste, en uiteindeluk was ut bèst wel gezellig en ware we ok wer zeker nie de urste die naor huus ginge.

Un wèk latter, op **1 fibbrewarie**, ginge we bijna mit zien alle naor Circus Mök. Ik zeg bijna, want bej hoëge uitzondering kos Vorst Jop nie mit umdat hej un brulluft haaj. Ut schient dit jaor unne bèst goeie mök gewist te zien, en ut fiëstje dernaon haaj ok niemes iets ovver te klage. Reje te mier um ut d'r es aover te hebbe um dukker mit Circus mök de vorst thuus te laote.

8 fibbrewarie was de receptie vur prins Fabian en Prinses Lonneke. Lonneke haaj unne moje neje bloes an, wat niemes gezien het en wat niemes moog wiëte. Ut begos uiteraard mit ut officiële gediëlte, en iederiën is wer vurbej gewist, van de Muziekverieniging Ons Genoegen tot en met de raad, en ok alle jaormedailles zien hier wer uitgereikt. Daornao was ut un moj fiëstje mit DJ Andre Bon Apart. Toen den klaor was zien we nog hiël ekkes naor d'n terp gewist, en ansluutend wiere d'r uiteraard ok wer eier gegète. Ik mot wel zegge dat de prins en prinses ut echt goed geregeld han. As ge es unne kier op tied naor huus wot dan koste vanaf hallef 4 's naachts al bej hun thuus terècht, want dan deuj dochter Lin zurrege dat gej nog un eike kost ète. En as ge gewoën um 5 uur mit Fabian en Lonneke tegeliek naor huus ginge, dan deuj de Prinses mit wat vrollie zurrege dat ge nie mit un lege maag hoefde te gaon slaope. Dat is nog es moj.

9 fibbrewarie was de receptie vur Jeugdprins Pepijn en Jeugdprinses Janne. Ok hier is un hiële rits van familie, vriende, bekende en meense die zin han ien un fiëstje nève gewist. De familie van de jeugdprinses han nog un leuk kadoetje: Aangezien Janne zo'n fan was kwaam "Pruuf mar" un optreje verzurrege. En ut was ontzettend druk en gezellig, en dat de vastelaovend nog volop lèft bej de jeugd was wel te zien an ut feit dat ze mar nie naor huus won gaon.

Ok is de jeugdvorsteraad nog vurbej gekomme um Pascal en Lizzy ien ut zönneke te zette, dit umdat zej zich al 11 jaor de biën onder de koont uut renne bej de jeugdcommissie. Ok Jeugdprins Pepijn en Jeugdprinses Janne hebbe hun moj bedankt vur hunne ienzet. De afterparty was ok gezellig mit de DJ's Robert en Willem.

Tradisiegetrouw is de wèk vur de vastelaovend un wèk dat we probiere nie te veul te planne, zoëdat wej moj uutgerust an de vastelaovend kunne beginne. En mit rust bedoele we tiggeworrig dat we mar 4 van de 7 daag op stap gaon, kwame we achter.

Want **woensdag 12 fibbrewarie was de JVV-aovend 2.0.** Dit jaor was de aldere-aovend wer ien d'n Terp. En daor hebbe we biëstig lekker gegète, Paula haaj maer liefst 28 kilo piepers gejust vur de boeremoes. Wil Peters miek wer muziek, Koen van Soest haaj unne leuke buut, en

Jack Hanssen den miek den aovend compleet dur as troubadour muziek van vroeger te speule. De organisatie en de vrollie liepe rond vur un natje en un droogje, mar nie zonder ut lekkerste toetje achteraoover te drukke. En prins Fabian was ziene scepter nog ekkes kwiet, mar nao un reundje te gève was den ienèns wer terug. De meense voonde ut ok fijn dat ze de lekkere zachte stuul uut de Liende han um op te zitte. Gelukkig haaj de commissie die via de officiële wèg geregeld.

Vrejdag 14 fibrewarie zien we wer naor ut Ald Wieverbal ien Câtele gewist. De helleft mit de fiets en de slimme helleft mit d'n auto. (Die vère en mantels motte nou iënmol zuunig op zien) en hier was ut eigeluk ok bèst wel gezellig. Vorst Jop was op den terugwèg ziene eige jas kwiet, en het ondertusse Toffel vur 5 cent gegove umdat den ziene jas an haaj, mar vurdat we bej den prins ware haaj den vorst de goeie jas wer an, wat extra knap is umdat Toffel op de fiets zaat en Jop mit den auto was. Oftewel, gewoën wel goed kieke is ok un kunst. En 3 kier raoje wat we bej de prins tuus ginge doen... Juust: Eier ete

Zaoterdag 15 fibrewarie was 's mèrges ut startschot van Expeditie Jeugdmök. De jeugd van Oeldere hebbe wer den halve dag dur Oeldere gerend um de mök te viende, en ut was wer geslaagd dit jaar. De kiender ware wer hiëlmol uitgeput an ut end van den dag, en de begeleiders trouwes ok, ondanks dat Mark Steeghs den dag 5 kilo krulle minder mit hoofde te slejpe.

's Middags was de krantverkoëp. Dit jaar is nog onder begeleiding van Rob d'n krant gemakt, vollegend jaar wert dat stökske aovergedrage an Toffel. Ut was wer unne mojje krant den ok wer goed verkocht is. En Willem het ut zellefs vur mekaar gekrege um unne sponsor nog unne kier extra vur den krant te laote betale. Gelukkig vur Ruud het hej dit ok wer gecorrigierd.

Den aovend woj ozze prins nog gèr mit un bus op stap, en zien we mit un volgelaie bus naor ut **Verklèdbal ien Ysselsteyn** gewist. Dit jaar is op andringe van Vorst Jop zien portemonnee wél entree betald. Ien Roelanzia was ut bèst wel druk. Ge kost wel moj kieke: Óf ge stond veuraan ien de drukte waar ut wèrm was, óf ge stond achteraan waar ut nog steeds wèrm was mar waar ge de muziek genèns kóst huure. Ut zwiët gõtste os uut ut gezicht dus wej han wèrk zat mit al dat verlore vocht wer anvulle mit bier. Ik wil nie ovverdrieve mit hoe wèrm ut was mar ik zeuj zwere dat ik op un gegeve moment twië Hobbits zaag die unne goude ring naor binne smete. Ut was èvegoed wel gezellig, zo gezellig dat un niet nader te noeme persoon terwiel hej mit zien kersverse vriendin ien Australië an ut beeldbelle was de wasbak tuus volkotste. Uiteraard mos den aovend wel afgeslote werre mit un lekker gebakke eike bej prins Fabian en Prinses Lonneke tuus.

Op de zondag den toen al begonne was zien we 's middags naor de prinsereceptie ien Aostrum gewist, umdat Bjorn Leijssen uut Oeldere daor adjudant was geworre. Wie zedde? Juust, dat was ok os probleem, want niemes kende den meens. De oplossing: Un terpkaart um m bèter te liere kenne. Wej kwame der trouwes achter dat ze daor denke ze dat Oeldere uiteindeluk vanzelf bej Aostrum gõt huure, mar hebbe zellef nie ien de gate dat ze eigeluk zellef al bej Venroj huure, alliën dan mit Bontje. Wej wón trouwes eigeluk hiël ekkes naor de resepsie gaon, mar aangezien wej 4 kier bej hebbe motte lappe is dat ok wer nie gelukt. Daornao efkes naor d'n terp. Gelukkig dat os prinsepaar ok verstandig deuj en nie um hallef 2 'snaachts pas naor huus ging en daor afsloot mit shotjes.

Donderdag 20 fibbrewarie ginge we naor de SJMO. Daor was ut net zoëas andere jaore wel gezellig. Ok was ut net zoëas ander jaore hiëlemol nie kald. En net zoëas ander jaore was ut daor op tied afgeloëpe zoëdat wej nog goed uut kosse ruste vur de vastelaovend. Ut was totaal nie verstandig gewist as wej nog naor de kroeg ware gegaon en daornao nog eier zun hebbe gegete mit de prins en prinses.

Vrejdag 21 fibbrewarie was wer de jaorlukse schólcarnaval. Ut was un moj fiëstje vur de kiender, veurafgegaon dur unne optocht dur Câtele. En ge zut dit nie geluëve, de afterparty was nog best wel gezellig ien de Köster. D'r stond unne DJ vur 's aoves en ut was best druk. Uiteraard was ut ozze vorst den ut ut minst lang volhield en toch mos gaon dreige mit un voetreis naor Oeldere vur os prinsepaar. As dank vur dees wieze weurd moog vorst Jop bej hun mit friet ète.

Zaoterdag de 22^e was ut groëts vastelaovesontbijt, wonderwel zonder zwarte eier. Daornao ginge we naor ut klènste mökske, en dit jaor was dat bej Marc en Monique mit hunne Jari. Os prinsepaar wis wel hoe ze un klèn kiendje vast mosse halde dus dat liete ze ok nog ekkes zien. Toen wej zen dat we hóst mosse gaon umdat we ok nog mosse ète, kwam Monique mit un geweldig idee, en nog geweldigere soep, brödjes, wèrm vleis en wiët ik wat allemaol. Wej genote d'r ien ieder geval zeker van, en han daornao ok genoeg energie um de paol mit ut klènste mökske buute ien d'n hof te zette.

's Middags was de prinse-installasie ien Rooy. Ut was unne lange zit, mit veul zang, mar uiteindeluk kregge we wel moj un Bebouwde kom-bord mit Oeldere derop geschreve van ozze neje burgemèster. Uiteraard daornao nog un paar drinke ien de Foyer, waar de dansmariekes der achter kwame dat de Flügel ok vur niks was, al zal dat warschienluk ok wel vur de lèste kier zien gewist. Doornao naor buute, mar umdat ozze sik anders naor huus mos loëpe is Vorst Jop mit pien ien ut hart ok nie mer naor de Roetsj gewist en het ie ur netjes tuus afgezet. Gelukkig hebbe de prins en de raad zich daor keurig netjes gedrage.

's Aoves was d'r vur ut urst gen vastelaovesmis, mar zien we gelijk naor de Liende gegaon vur ut mökkebal mit ut thema: Bouwvak iendrinke. Um den aovend te opene mos Prins Fabian mit unne groëte hamer urst de bekiësting van de medaille kapot houwe, um den vervolleges ien de kast op te kunne hange, en slope ging um goed af. Vervolleges het ozze past-oer Willem te Plate os nog gezègend. Daornao kregge we ok nog wat hoëgwaardigheidsbekleders uut Rooj, ien de volksmond ok wel de überdiknekke van de Piëlhaas op bezuuk, die op un kennismakingsreundje ware. Wej kregge nog un kadoetje van hun, en toen mosse ze wer snel verder ien hun drukke programma. De Towerband scheidde d'r wel tameluk vroeg uut, mar mit unne tillefoon en unne Jop-up DJ was dat zoë opgelost. Daornao hebbe we nog lekker ien de Liende eier gegète.

Zondag 23 jannewarie was normaal gesproke de optocht gewist, mar ien verband mit ut slèchte wèr wier den uutgesteld tot dinsdag. 'S Middags was èvegoed ut kienderbal, en dat was gezellig druk. DJ Ruud en Eric kosse ut nie laote um toch wer un jaor te drèje nou hun kammeraöj ut prinsepaar ware geworre. Uiteraard voonde wej dat hiëlemol nie èrg, behallevé toen wej mit de ganse raad en alles naor baove mosse um te danse. Ze mieke d'r un moj fiëst van en d'r wier veul gehost en gedanst. Uiteraard wier ok de jeugdcaarnaval geopend dur Jeugdprins Pepijn en Jeugdprinses Janne. Tigge den aovend nog efkes naor de soos, en daornao naor d'n Terp, en uiteindeluk is d'r toevallig afgeslote bej Fabian en Lonneke waar we eier hebbe gegete.

Ozze penningmèster was hier nie bej, den was nog druk bezig zien huus binne te komme.

Maondag 24 fibbrewarie, ut Snotneuzebal. De allerklènste han wer de vloer, en ut was wer lekker wèrm. Toen de ballonne naor beneje ware zien wej snel op ut podium wat gaon ète, en gauw de bus ien naor den Brakke Maondag, un nej initiatief um uuteindeluk de maondag nog gezelliger te make vur iederiën. D'r ware twië busse volgeboekt um ien d'n Oelderse bocht mit zien alle un pilske te drinke, en de Rooyse optocht te kieke. Uiteraard stoond de jeugd en de hoëghede wel op de wage. Nao d'n optocht naor de Liende, waor ut hartstikke druk was, en d'r ok nog unne zanger stoond, den de sfeer d'r goed ien brocht. Ok kosse we mit zien alle nog un lekker brödje schaop ète, of pannekuuk. De uutreiking van de Jeugd-Expedisie mök wier ok op dizze middag gedaon. Uuteindeluk vrej laat nog naor de soos en dan 's aoves uiteraard wer naor d'n Terp, waor ut wer èrg gezellig was. Gek genoeg wier der dizze kier vur de verandering eier gegète bej de prins en prinses.

Dinsdag 25 fibbrewarie begosse we, net zoëas vroeger, mit d'n optocht. Ut was wer unne mojje optocht, en de meense neve de kant hebbe wer genote. Wie zeuj d'r dit jaor mit de prieze vandur gaon? Daornao snel naor den Terp vur de brunch, en ok dat was wer lekker. Dit jaor hebbe we Jan Claosses ok nog unne medaille gegove vur ut reje mit den trakter tiejes den optocht, en Gerrit en Paula vur hun verdienste. Daornao wer naor de Liende vur de BBZ. Dit jaor was dat ok wer èrg druk en gezellig. De hiële familie van alle hoëghede, de kammeraøj, de jeugd, de raad, Ger Jansse d'n Twedde, de Venrodse USB-stick-artieste; iederiën kwaam wer vurbej op dizze middag. Nao de BBZ bouwde DJ Ruud Rutte nog un moj fiëstje, en kwame ok nog Bjorn Leijssen mit Nevvenen op bezuuk. Ok was nog de priesuutreiking van de optocht, en ok de afsluuting van de Jeugdcarnaval ien de Liende. Pascal haaj ok wer un mojje Proclamasie gemakt die Jeugdprins Pepijn en Jeugdprinses Janne hebbe vurgelèze. Nog unne kier speeche, iëne polonaise ien de nek en nog gauw un Brödje Hamburger of knak ète vur de jeugd naor de soos ging.

Mit de groëte meense dun wej nog uuteindeluk ut lèste pilske, mar stiekum hebbe ze d'r nog un paar mier getapt. Daornao hiël ekkes naor d'n Terp um vervolleges wer um te drèje um naor de soos te gaon en af te sluute. Nao nog un paar lèste speeches, de medaille ophange, en nog 5x ut lèste liedje, ging de mök vur de jeugd ien de hens. Vastelaovend 2020 was vur de jeugd nou echt vurbej.

Toen wer mit zien alle naor den Terp, waor we nog hiël ekkes kosse fiëste tot hallef 12. D'r wier op ut biljart gedanst en gezonge. Ut mojje was dat Pluum op dees foto genne draadloze microfoon het, mar dat miek um niks uut. Toen was ut tied vur de afsluuting. Ut was zo druk dat eigeluk nog nie èns iederiën "beneje" kos staon.

Eric en Ruud wiere nog bedankt dur de prins en prinses vur ut toch nog unne kier drèje.

Loek en Silvia wiere bedankt vur hun verdienste bej ut bestuur, helaas was ut noëit gelukt um um ien pak te kriege, mar toch het hej zien steentje bejgedrage. Daornao wier de vastelaovend afgeslote mit Prins Fabian en Prinses Lonneke. Vorst Jop bedankte hun vur ut mojje seizoen, en daornao was ut lèste woord vur Prins Fabian. Toen den iederiën bedankt haaj ginge we mit zien alle de règen ien um den mök ien de fik te steke, en daornao naor binne vur de afterparty.

Mèstal hilt hier ut verhaal op, mar dit jaor gebeurde d'r toch nog wel un paar noemenswaardige dinge. Mar ièn daorvan, en wej hebbe ut bewies op fillem, um 3 uur 44, gebeurde ut. Jaorelang han wej gedocht dat ut nie kos, dat ut onmeugeluk was, en dat we ut d'r mar mit mosse doen, mar toen op dat moment, wisse we dat we al die jaore vur de gek ware gehalde. D'r wier un dansnummer gedrèjd, en wat der toen gebeurde, han wej ien os stoutste droëme noëit kunne bedenke: Vurzitter Robert, ging, gehiël vrejwillig, MIDDE op de dansvloer staon, piek zien Vera bej de hand, begos mit ur te danse, en ok nog te zinge.....en ok nog IEN DE MAOT! Wej wisse nie wat we zage. Nao al die jaore dat hej zellefs uut de maot kos STAON han wej dit nie vur meugeluk gehalde. Mar goed, ut was prachtig um te zien.

En toen eigeluk de mèste meense al ien bed len, kwame de echte muzikante naor baove ien Mark Steeghs, Han, Pouwl, en Rob. Vol overtuiging ging Mark tekier op de trät, Rob en Han op de drum, dwars dur mekaar hin, ut ritme angegove dur Paul ten spiet. Ut was zo emotioneel dat wej toch nog mit zien alle stoonde te bäoke op den dinsdagaovend, mar wel van ut lache. Dizze nacht wiere d'r gen eier gegète bej Fabian en Lonneke, enkel ok alliën mar umdat ge 06.00u smerges gen nacht mer kunt noeme. En zoë kwaam d'r un eind an de eierètmarathon, oftewel Vastelaovend 2020.

En as ge dan denkt, dan zal ut prinsepaar wel kapot zien? Nao ut assekruuske daags dernao kreges wej um 05.00u 's nachts nog un foto van hun, Gerrit en Toffel ien d'n Terp...

Nog un paar kleine dingskes die toch wel de moeite wert zien um te benoeme:

- Câsele haaj ut idee van ozze medaille gejat
- D'r was ok nog iets mit "Ut mysterie van Câsele"
- Der mos nog ekkes snel un neje umliesting vur de krant gehald werre, den flikkerde al uut mekaar vurdat hej was uutgereikt
- Dan was d'r nog iets mit Code's ien bepaalde kleure
- Toffel zoot op de bank bej Faab waar hej vond dat tiggeworrig ut FIFA-spelleke wel verekkes realistisch deruut ziet. Ut bleek un samevatting van echt voetbal
- Os mam, a.k.a. de sik, die het tot ur opluchting gelierd dat as de kels van de raad ut mit de dansmariekes ovver "Neuke" hebbe, dat ze toch mèstal ut shotje bedoele
- Han zet schienbaar elleke aovend zien dochters welteruste, ok snaachts um 5 uur
- Rob vond ut goed as zien dochter utging mit kels, ma dan mosse ze wel betale
- Sinds dit jaor hebbe wej de dansmariekes ien de raodsleje-app, en we ware bang dat ut af en toe te grof zeuj zien. Das was ut ok, ma dat kwaam zeker nie alliën dur de kels
- Toffel 5 kratte bier het verlore, umdat hej vurdat Faab prins wier mit um haaj gewed dat hej gen prins wier.
- Zoë, nou heb ik toch nog alles genoemd, en zoëas iemand bekends dat ok zo moj kos zegge: dan kunne we dit seizoen toch nog un beetje goed afsluute.

Dit was ut jaorverslag 2019-2020.